

Jí² 'lái² 'wii²¹² 'e gasii¹ in San Pablo tíi² tsá² 'in néei¹ Tsalónica

Poo² coon¹³ 'in ngi¹ coon¹³ sii¹ in 'e jí² lo

1 1 Jna-a, Poo², coon¹³ Silvano coon¹³ Timoteo jmoo²¹ o'o 'e jí² lo 'e sii²¹ na'a tyii¹ 'in jo¹ líi² Cristo 'in seen²¹ fuu²¹ Tsalónica, jileei²¹ 'naa' 'in sicaain²¹² coon¹³ Dios Jmii²¹ joongi coon¹³ Jesucristo. 'In²¹² moo'o 'e Dios, 'in Ñũ¹³ o', cwouncwaa¹³ i 'naa'. Joongi cwouncwaa¹³ i Ña'ñũ¹ u' Jesucristo 'naa' joongi 'e cwo¹ 'e seen²¹ naa' 'e tyú² juncwii²¹ tyii¹.

Xiiala niga'e² e Poo² tsá² seen²¹ Tsalónica
'e tsáai¹-tsi Dios coon²¹ tøø² mo

2 Coon²¹ tøø² mo cwo¹³ o'o 'maai¹³ Dios 'wii²¹² tyii¹. Joon mi faa¹³ a'a júu³ tyú² mii²¹ i'i 'wii²¹² tyii¹. **3** Tii¹³ i'i-tsii¹ tyani Dios Jmii²¹ xiiala gajmaa² naa' to² wii¹³ ja² mo galí² naa'; joongi xiiala gauncóon¹³ oon' tsá² 'wii¹³ i 'iin²¹² moo' Dios; joongi xiiala nisijaan²¹² oo' tá taain²¹² -oo' 'e untsiin²¹ mo Ña'ñũ¹ u' Jesucristo júu³ tya'a. **4** Tsaru¹ u', 'iin²¹² mo Dios Jmii²¹ 'naa' joon nee² o' 'e nigatyii¹³ in Dios 'naa'. **5** Jna'a mo gacwoo¹³ o'o 'naa' júu³ tyú² tya' 'e tiin¹³ tsá² jon' wa'a jmaai² júu³ pe coon¹³ jilaa²¹ 'ii²¹ tya' Espíritu Tyú² tya' Dios joon jo cu²-tsii¹ wa' líi² naa' 'e jo jo¹ 'e júu³ do. Tyú² -u' ñí³ oo' yaanaa' xiiala nigajmoo²¹ o'o jee²¹² 'naa' coon¹³ 'e tyú² tyii¹.

6 Joon 'naa' cwáain¹ tyii¹ gañí³ ii' wúu¹ la gamó¹ jna wúu¹ la joon jon ganí² Ña'ñũ¹ u' Jesucristo wúu¹ 'wii¹³ júu³ tya' Ña'ñũ¹ u' Dios Jmii²¹. Joon ga'ii¹³ moo' júu³ tya' Dios coon²¹ 'e jløø¹³ moo' fiin¹³ líi¹ wúu¹ nigañii² ii'. 'In Espíritu Tyú² tya' Dios gauncoon¹³ 'naa' 'e li jløø¹³ moo'.

7 Coon¹³ cwáain¹ la joon ga'ee¹³ ee' tsá² 'in jai² líi² Cristo fu li sii²¹ Macedonia coon¹³ fu li sii²¹ Acaya xiiala ingí². **8** Jon'gi jiin¹³ joon niganúu² un júu³ tya' Ña'ñũ¹ u' 'wii¹³ 'naa' pe la caan²¹ mo galiñii¹ o xiiala nigalitsáa¹ mo-'oo' Dios. Jo 'ná¹ jmó² gií¹ júu³. **9** Lí¹ cii¹² galí². Yaamo 'in tsá² do síi¹ i xiiala ga'ii¹³ naa' jna'a coon¹³ 'e tyú². Gatuu²¹ oo' jilaa²¹ 'e gaun'goo²¹ oo' 'e litsáa¹ mo-'oo' Dios 'in jiin¹ joongi 'in jai². **10** Joongi tya¹ o 'in tsá² do júu³ xiiala sijaan² aan' mi jó¹ fu ñũ¹ fú² 'in Joon¹ Dios 'in gajmaa¹ Dios gajiin¹ in jee²¹² líi²¹². 'In Jesús do 'ii' 'in niláa² mo jna' jilaa²¹ 'ii²¹ tya' Dios ijó¹.

To² 'e gajmaa¹ Poo² fu Tsalónica

2 1 Tyú² -u' ñí² 'naa', tsaru¹ u', jilaa²¹ to² gajmoo²¹ o'o jee²¹² 'naa' jo ti' galí². **2** Ñí² oo' xiiala gaun'lii² i jna'a fu Filipos, joongi jilaa²¹ wúu¹ 'e niganee²¹ e'e pe jo ní³ ii' ee lí² Dios tyii¹ gauncoon¹³ on jna'a 'e

nigacwoo²o'o 'naa' júu³ tyú² tya' 'e tiin¹³ tsá² jo 'ee cu¹²-tsii'i fiin¹³ jo cwo¹ tsá² júu³ ruu²¹i 'áai¹. **3** Tsu jilaa²¹a 'e faa¹³a'a jmai¹² júu³ ja²mo. Jo ga'ee¹³e'e 'naa' 'e un'lee²¹naa' yaanaa' jon'gi tyiin²a'an 'naa' too². **4** Jon'on la joon tsu Dios nigatyii¹³in jna'a joon gatyaa¹ cwoo²¹o'o júu³ tyú² tya' 'e tiin¹³ tsá². Joon jiin¹³ la joon faa¹³a'a jon'gi wa'a joon¹o'on tyú² coon¹³ tsá² pe coon¹³ Dios 'in ñii¹i jilaa²¹ 'e 'i¹-tsi' si 'e tyú² si 'e gó² 'ee. **5** Tsu tyú²-u ñí²ii' xiiala gauntyú¹ jna'a 'naa' tyaní²ii' jon'gi 'naa'¹³a'a cwáain¹ wa'a xiiala jnaa²a'a cuu² tsu Dios tyan¹ cwáain¹ 'elo. **6** Jon'gi 'naa'¹³a'a cwáain¹ wa'a un'goo²¹ tsá² jna'a jon' 'naa' tiin¹³ jon'gi tsá² xeei²¹ 'ee xufiin¹³ 'in tyiin² jna'a coon¹³ to² 'e 'oo²o'o coon¹³ 'ii²¹ tya' Cristo. **7** Li' cii¹²i jmó² jna'a 'e 'wo²-tsiioo'o 'wii¹³ tyii' lawa jaain²¹ tsamí² 'in jòø² jón¹on joon 'nee¹mo. **8** Líi¹ li'nee¹na'a 'naa'. Jilaa²¹ 'e cwoo¹³o'o 'naa' jon'on jiin¹³ júu³ tyú² tya' 'e tiin¹³ tsá² pe ca juncwii²¹ tyiioo'o nicwoo¹³o'o 'naa' tsu líi¹ nigali'iin²¹²na'a 'naa'. **9** 'Naa', tsaru¹u' niñii²¹oo' xiiala jmoo²¹o'o. To²-o jmoo²¹o'o la 'woo¹ tiin¹³ la jmii¹. Joon saan²¹ tyii'i tsu 'wii¹³ jo 'iin²¹²na'a 'e untyí²na'a 'naa' jiin¹³ jaain²¹ jee²¹² 'naa' la 'ii²¹² cwoo¹³o'o 'naa' júu³ tyú² tya' Dios.

10 'Naa' jòø²øø' joongi jòø² Dios xiiala toon²¹o'on 'e tyú² joongi coon²¹ tsáa¹ coon¹³ 'naa' 'in jai¹² líi². Gatoon²¹o'on 'e jo lí² cwo¹ tsá² jna'a tsaa² ce jiin¹³ coon²¹. **11** Tyú²-u joongi ñii²¹oo' xiiala nigacwoo¹³o'o 'naa' pí² joongi nigacwoo¹³o'o 'naa' cwáain¹ la jaain²¹ la jaan²¹naa' la jmoo¹o jaain²¹ jmii²¹ tsá² coon¹³ jón¹on. **12** Niga'ee¹²e'e 'naa' xiiala 'ná¹ ngí³naa' tyani tsá² tsu tsá² tya' Dios 'naa' tsu Dios gatø¹ø 'naa' 'e ní²ii' jee²¹² jilaa²¹ 'e 'ya²gi li tyu² 'ii to². **13** 'Wii¹³ joon coon²¹ tøø²mo cwoo¹³o'o 'maai¹³ Dios tsu 'naa' mo ganu²uun' júu³ tya' Dios 'e gafaa¹a'a ga'ii¹³moo' lawa júu³ tya' Dios jon'on ga'ii¹³naa' lawa júu³ tya' tsá². Joon 'e la ja²mo 'e júu³ do júu³ tya' Dios 'e cwo¹o pí² jee²¹² 'naa' 'in jai¹² líi². **14** Tsaru¹u', mo gajmeei²¹ tsagoo²oo' 'naa' gangii²¹²naa' la ngangíi¹ 'in tsá² Israel 'in jai¹² líi² Dios seein²¹ Judea tsu 'in tsá² Judea do 'in nigajai¹² líi² Cristo nigajmee²¹mo tsagoo¹o 'ii. **15** La joon jon 'in tsá² do nigajnga²mo Ña'ñu¹u' Jesús la nigajngaa¹²i tsagoo¹o 'in gacwo¹ júu³ tyú² tya' Dios ca la mo jeei¹. Joon ga'øø¹mo jna'a. Jo gaun'goo²¹ 'ido Dios joon 'ee¹mo jileei²¹ tsá². **16** Jo cwo¹ faa¹³a'a júu³ tyú² tya' Dios tya' 'in jo seein²¹ Israel itiin¹³in. Cwáain¹ la joon galí² fee¹gi tsaa² tya'a pe la ja²mo injó¹ wúu¹ tya' Dios jee²¹² 'ii.

'Tin²¹²in Poo² tsafee¹²i tsá² Tesalónica coon²¹gi tún¹

17 Tsaru¹u', nigaxee²¹na' coon²¹ sii¹³xu coon¹³ 'naa' pe fiin¹³ jo nee²¹na'a 'naa' 'i¹-tsii'i 'naa'. Pe líi¹ 'yaai¹-tsii'i jajøø²¹²na'a 'naa' tún¹. **18** Ga'í²-tsii'i jaa²¹a'a, joon jna-a, Poo², gali'iin²¹²na yíi³aa 'láai² naa¹³ pe 'in 'liii³ Satanás gajni²¹mo. **19** 'E taan²¹²naa' coon¹³ jna'a ilí² 'e tyú² tyii'i mi jó¹ Ña'ñu¹u' Jesucristo. Najløø¹³na'a joongi 'yaai¹-tsii'i tsu 'wii¹³

'naa' taan²¹²naa' do. **20** 'E ja²mo 'wii¹³ 'naa'oo' ilijløø¹³moo'o joon tyú²-u si'í¹³-tsii'i.

3 1 Joon tsu 'wii¹³ 'i¹-tsi' 'áai¹ 'wii²¹² tyii' nisí¹i'i wa'a joon²¹oo 'ñii'a jiin¹³ fu Atenas. **2** Joon sii²¹na'a tsaru¹u' Timoteo jajøø²¹²i 'naa' tsu tsá² tya' Dios 'ii 'in nigajmaa¹a to² coon¹³ jna'a. 'Ii gauncoon¹³on jna'a 'e cwoo¹ júu³ tyú² tya' xiiala itiin¹³ Cristo tsá². Joon lí²-i cwo¹o 'naa' 'e 'øøi²¹gi-'oo' joongi 'e tsáai¹gi-'oo' Jesús. **3** Joon la joon 'naa' jo cwo'íin²-oo' 'e cwáain¹ lo 'wii¹³ fa'í³ 'e sá² tyii' tsu ñí³oo' 'e i'øø¹mo tsá² jna' jile¹'e' jiin¹³ 'in jai² líi² Jesucristo. **4** 'Wii¹³ joon la mo gatoon²¹o'on jee²¹² 'naa' ga'ii²¹i'i júu³ 'naa' 'e i'øøi¹ tsá² jna'. Joon la joon galí² la lí² 'e ñí²i'i. **5** 'Wii¹³ joon cu²-tsii 'wii²¹² tyii'. Joon gasí²na Timoteo jaunngii²i 'naa' xiiala seen²¹naa' ti tsáai¹gi-'oo' Cristo. Cu²-tsii lí²na wa'a 'in 'líi³mo niga'lee¹²i 'naa' 'e ti' nigangó¹ lí² caa¹mo coon¹³ jilaa²¹ to² tyii'i.

6 Pe nano Timoteo nicwa²mo jaa¹²i fu Tesalónica. Joon tyíian²o júu³ tyú² 'e jo¹gi líi²naa' joon xiiala 'iin²¹²naa' tsá². Tyaa²¹o júu³ 'e 'áa¹mo tii¹³-oo' 'e jløø¹³moo'. Joongi 'yaai¹-oo' 'e jøø²¹²naa' jna'a la joon jon jna'a 'iin²¹²moo'o jøø²¹²na'a 'naa'. **7** 'Wii¹³ joon tsaru¹u', fiin¹³ taan²¹²na'a fa'í³ 'áai¹, mo ganuu²¹u'un 'e tsáa¹mogi-'oo' Jesús galijløø¹³moo'o 'áai¹. **8** Galí² lawa coon²¹ juncwii²¹ 'múui² tyii'i mo galinee²e'e 'e tsáa¹mogi-'oo' júu³ tya' Ña'ñu¹u'. **9** Líi¹ cwoo¹³o'o 'maai¹³ Dios tyi' tsu líi¹ jløø¹³na'a tyani Dios 'wii¹³ 'naa'. **10** La 'woo¹ jmii¹ fee¹³na'a Dios ce caain¹-tsii'i 'e cwocwoo¹ Dios jøø²¹²na'a 'naa'. Coon¹³ la joon untsiin¹na'a jilaa²¹ 'e 'ná¹-gi litsáai¹-oo'.

11 'Yaa¹mo-tsii'i 'e ña'a Dios Ñuu²o' coon¹³ Ña'ñu¹u' Jesucristo iuncoon¹³o jna'a joon lí²-i jafee¹³na'a 'naa'. **12** Joon 'iin²¹²na 'e iuncoon¹³ Ña'ñu¹u' 'naa' 'e ilí² 'neei¹gii' ruu²¹naa' la jaain²¹ la jaan²¹naa' coon¹³ jileei²¹ tsá² xeei²¹ la 'nee¹na'a 'naa'. **13** Coon¹³ la joon tá² taain²¹²-oo' jo tsaa² røøi²¹gii' tyani Dios, Ñu²o', mi jó¹ Ña'ñu¹u' Jesucristo coon¹³ jileei²¹ tsá² tya'a.

Xiiala jmoo¹o tsá² 'e 'iin²¹²in Dios

4 1 La no tsaru¹u', jmii²¹i'i tyaní²i'i joongi tyaa²¹a'a cwoo¹oo' 'elo coon¹³ 'e sii²¹ Ña'ñu¹u' Jesús. Jiin¹³ la cwáain¹ 'e niga'ee²¹e'e jmaa²aa' la ngóo¹ 'naai¹³ no. Niga'ee²¹e'e xiiala ngí¹ tsá² 'e 'yaai¹-tsi Dios tya'a. Cwojmaa²gii' jiin¹³ la ga'ee¹³e'e 'naa'.

2 Nii²¹² 'naa' jilaa²¹ cwáain¹ 'e gacwoo²o'o 'ii²¹ tya' Ña'ñu¹u' Jesús. **3** Jilaa²¹ 'e 'iin²¹²in Dios Jmii²¹ 'e cwoseen²¹moo' 'e tyiia¹-oo' jiin¹³ 'ii-o joongi 'e jo 'nóo³oo' tsaa². Jiin¹³ jaain²¹ 'naa' jo cwo'laa²¹² 'naa' coon¹³ tsamí² xeei²¹ jiin¹³ la coon¹³ tsamí² tyiioo'. **4** Jilee²¹mo cwoliñii¹i 'e lisee²¹mo coon¹³ tsamí² tya'a 'e tyú²-u tyani Dios 'e jo faa²¹ tsá² 'laa²¹ tya'a. **5** Jo jmaa²aa' la lí² 'e jmoo¹o tsá² 'in jo tsáai¹-tsi Dios 'in caa²¹i tsamí² jiin¹³ la 'iin²¹²in ña'a. **6** Jiin¹³ jaain²¹ jo 'in cwofee¹i 'oo²¹²o tsañuu²¹ ruu²¹i la lí² 'e jmoo¹o 'in jo tsáai¹-tsi Dios tsu Ña'ñu¹u' i'e²e

wúu¹ jileei²¹ 'in 'láa¹ la joon jiin¹³ la nigafaa¹³a'a. **7** Tsu Dios nigatø¹ø jna' 'e toon²¹²on' jmoo²¹o' jmaai¹³ 'e tyú² 'e tyu¹² 'ido to² jon'on 'e 'laa²¹²a'. **8** La joon jileei²¹ 'in jo tsáai¹-tsi 'e júu³ lo jon'on tsá² wa'a jo tsáai¹-tsi, Dios 'in jo tsáai¹-tsi 'ido tsu Dios nigacwooi¹ jna' 'in Espíritu Tyú² tya'a.

9 Jo 'ná¹ jmáa³gi júu³ 'e li'nee¹naa' tsaruu²¹naa' tsu Dios niga'e²e 'naa' la jaain²¹ la jaan²¹naa' 'e un'nee¹naa' yaanaa'. **10** La joon jmaa²aa' jee²¹² jileei²¹ tsá² jo¹ líi² 'in seein²¹ Macedonia. Pe mii²¹i'i tyaní²ii' 'e 'áai¹gi un'iin²¹²naa' tsaruu²¹moo'. **11** Cwoo¹³-oo' cwoliseen²¹moo' tyú²-u cwáain¹ tyii'. Jmaa²aa' to² coon¹³ cwoo¹oo' jiin¹³ la li júu³ 'e niga'ii²¹i'. **12** Cwoseen²¹naa' coon¹³ la joon tsu joon iun'goo²¹o tsá² 'in jo tsáa¹-tsi Dios 'naa'. Joon la joon jo 'ee i'naai²¹ tyii'.

Mi jó¹ Ña'ñu¹u' Jesús

13 Tsaru¹u', jo 'iin²¹²na wa'a jo liñii²ii' xiiala mi júuin² tsá². Jo 'ná¹ jmaa²aa' fa'í³ la jmoo¹o 'in tsá² 'in jo ñii¹i 'e jiin¹in tsá². **14** Jiin¹³ la mo líi²na' gajún¹mo Jesucristo joongi gajiin¹in tún¹. Jiin¹³ la joon jon tsáai¹-tsi 'e Dios ijmáa¹a jiin¹in jileei²¹ 'in tsáai¹-tsi 'ii mi júun²in. Joon jalíin²mo coon¹³ Jesús mi jó¹ tún¹.

15 'Wii¹³ joon sii¹³i'i 'naa' jiin¹³ cwáain¹ 'e ga'e'e¹e Ña'ñu¹u' jna'a 'e jileei¹³ jna' 'in saan²¹²an' ca mi jó¹ Ña'ñu¹u' Jesús jo saa¹³na' nifugi lagi 'in nijúin¹. **16** Joongi i'in² lúu¹ trompeta tya' Dios tá² líi¹. Joon 'in Ña'ñu¹u' Jesús lo ixaai¹ fu ñu'fú². Joon coon¹³ to² tyu¹² Jesús do i'oo²¹²o 'in arcángel. Joon jileei²¹ 'in nijúin¹, 'in tsáai¹-tsi Jesús, 'ii nifu ijiin¹in tún¹. **17** Mi yuui¹³ joongi jileei²¹ jna' 'e saan²¹o' tsaa²¹a' caan²¹mo jee²¹² jníi¹. Joon licaan²¹na' coon¹³ Jesús tya'cwii²¹. Joon la joon tsaa²¹a' coon¹³ coon²¹ tøø²mo. **18** 'Wii¹³ joon cwoo²oo' pí² ruu²¹naa' la jaain²¹ la jaain²¹ coon¹³ 'e júu³ lo.

5 **1** Tsaru¹u', jo tyiin²gi síi³na jí² cwáain¹ tya' jmií²¹² li gatséi¹ jatyéein¹ 'ii²¹. **2** Tsu niñí³oo' 'e 'ii²¹ tya' Ña'ñu¹u' ijó¹ 'uun²¹mo. Lawa jaain²¹ 'uun²¹ 'in jó¹ mi 'woo¹. **3** Mi jin¹² tsá² 'e jilaa²¹a nináa¹ røø²¹ jo 'e fo² sá²gi, jmií²¹² joon ijó¹ 'ii²¹ la jmoon¹o 'e i'íin² jilaa²¹ 'e sá². Lawa jmoo²¹ wúu¹ tya' tsamí² tyéein¹ yuun²¹ 'in 'ná¹ liseein²¹ jóon¹on, jo ñi² li liseein²¹ la joon jon jó¹ jmií²¹² joon 'e i'íin². Jo lí² tsasúuin¹. La joon jon ilí² jmií²¹² mi 'íin² jilaa²¹ do. **4** Pe 'naa', tsaru¹u', jo ngí³ 'naa' li nuu²¹ 'e 'ii¹³ 'moo' 'e jmií²¹² no jiin¹³ jo ñii²¹²-oo' la lí² mo saain²¹ 'uun²¹ tsá² jo ñii²¹²-tsi. **5** Tsu jilee²¹mo 'naa' see²¹naa' la tsá² 'in ngí¹ li' jmií¹. Jo seen²¹naa' la tsá² 'in ngí¹ li' 'woo¹ 'in jo tsáa¹-tsi. **6** 'Wii¹³ joon jo 'ná¹ cwuu²¹na' la cwuui²¹ 'in catyaai². Cwounjnaa¹-tsi' cwongii²¹i' coon¹³ 'e tyú² mootyii²¹i'. **7** Jileei²¹ 'in cwuui²¹ lí² 'woo¹ joongi 'in ngí¹ to² 'íin¹ li' 'woo¹ jon. **8** Pe jna' 'in 'e saan²¹²an' tsáai¹-tsi' cwoli²-tsi' coon²¹ tøø²mo. La toon²¹ 'láa² ñí³ nitsí¹ 'e un'øø¹mo 'ña'a la joon jon jna' un'øø¹mo' yiia' mi li'ii²¹²i' tsá² joon jo¹o líi¹na'. Lawa po³ ñí³ taa¹³ tyi² 'láa² 'ná¹

tsáa¹mo-tsi' itiin¹³ Dios tsá². **9** Tsu Dios jo gajmaa¹a 'ii²¹ wa'a nee²¹e' wúu¹ pe gajmaa¹o 'e tiin¹³mo' li tyú² 'wii¹³ cwáain¹ tya' Ña'ñu¹u' Jesucristo. **10** Jesucristo gajúun²in 'wii¹³i jna' 'e joon cwoseen²¹mo' coon¹³ jiin¹³ saan²¹an' si najún¹na' 'ee mi cwéei¹ tún¹. **11** 'Wii¹³ joon sái¹³naa' 'e cwáain¹ lo jee²¹² 'naa' 'e cwó²oo' pí² yaanaa' jiin¹³ la jmoo²oo' nano.

Poo² cwo¹o cwáain¹ 'in jai¹² líii² Cristo

12 Jilee²¹naa', tsaru¹u', mii²¹i'i tyaní²ii' 'e un'goo²oo' jilee²¹ 'in jmoo¹o to² tya' Dios jee²¹² 'naa'. 'Ii tsacóøi¹³ tyii' joon cwoo¹o 'naa' cwáain¹ xiiala jmaa²aa' coon¹³ 'ii²¹ tya' Ña'ñu¹u'. **13** 'Ná¹ un'goo²oo' 'ido joongi 'nee¹naa' coon¹³ jiin¹³ to² 'e jmoo¹o. Cwoliseen²¹moo' canii²mo la jaain²¹ la jaan²¹naa'.

14 Joon 'ii²¹i'i 'naa' júu³, tsaru¹u' 'e cwosii¹³ii' 'e cwocwo³-tsi jilee²¹ 'in jo 'iin²¹²in jmáa¹a to². Cwocwoo²oo' pí² jilee²¹ 'in jo mo tya¹-tsi. Cwouncoon¹³oon' jilee²¹ 'in tóin¹ 'í¹-tsi. Joon cwolifée¹mo-'oo' tya' jilee²¹mo.

15 Tsáa¹mo-'oo' 'e jo jmaa²aa' 'e gó² tya' 'in nigajmaa¹a 'e gó² tyii'. Lí¹ cii¹²i jmaa²aa' 'e gó², jmaa²aa' coon²¹ tøø²mo 'e tyú²-u la jaain²¹ la jaan²¹naa' joongi coon¹³ jilee²¹ tsá² taain²¹² juncwii²¹.

16 Coon²¹ tøø²mo cwolijløø¹³moo'. **17** Faa¹³aa' júu³ tyú² coon²¹ tøø²mo. **18** Coon¹³ jilaa²¹ 'e lí¹ cwoo²oo' 'maai¹³ Dios tsu la joon 'iin²¹²in Dios jmaa²naa' 'in tsáai¹-tsi Cristo Jesús.

19 Jo jnii¹³naa' 'in Espíritu Tyú² tya' Dios. **20** Nuu²uu' jilaa²¹ júu³ 'e faa²¹ tsá² tya' 'e sii²¹ Ña'ñu¹u' 'e gacwo¹ Dios. **21** 'Í²du-'oo' jilaa²¹ júu³ tya'a joon 'ii¹³naa' jiin¹³ 'e tyú²-u do. **22** Jeen¹³naa' co' coon¹³ jilaa²¹ 'e gó². **23** Mí²ii tyani Dios, 'in jmoo¹o 'ii²¹ røø²¹, 'e untyú¹mo 'naa' coonti. Joon mí³ii jon tyaní¹i 'e 'aa²mo 'naa' la tøøi², jilaa²¹ espíritu tyii', coon¹³ jilaa²¹ juncwii²¹ tyii', joongi coon¹³ jilaa²¹ cuerpo tyii'. Mí³ii 'e jaan²¹naa' coon¹³ jiin¹³ coon²¹ tsaa² ca mi jó¹ Ña'ñu¹u' Jesucristo. **24** Tsaai² 'in nigatyii¹³ 'naa' 'ii-i, jon iuntsiin¹ júu³ tya'a. Jo 'ná¹ jmaa²aa' cu²-oo' coon¹³on.

'í² Poo² júu³

25 Tsaru¹u', faa¹³aa' júu³ tyú² 'wii²¹² tyii'i.

26 'Aa²¹²moo' fú²uu' jilee²¹ ruu²¹naa' 'in jo¹ líii² júu³ tya' Dios.

27 Tyii³aa cwoo¹oo' coon¹³ 'ii²¹ tya' Ña'ñu¹u' 'e untsáa¹oo' 'e jí² lo tyani jilee²¹ tsá² 'in jo¹ líii².

28 Cwouncwaa¹³mo Jesucristo 'naa'. Amén.